

Dr. Joel Rajnherc, director di ImSan

ImSan mester bira e luga unda ta bay pa tratamento di malesanan no contagioso

\ORANJESTAD - “E vision cu nos tin, ta cu ImSan mester bira pa henter Aruba - y kisas un ehempel pa Caribe, e luga unda bo ta bay pa tratamento di e malesanan no contagioso, e NCDs. Esaki ta segun director general di Instituto Medico San Nicolas.

E enfermedadnan cronico, e enfermedadnan cu ta stroba bo no solamente den e edad cu bo por yega, pero den e placer di bo bida tambe cu bo ta bay pasa bo ultimo añan,” segun Dr. Joel Rajnherc, kende ta director general di Instituto Medico San Nicolas, ImSan.

Malesanan cronico

Ta conoci cu na Aruba tin hopi pashent cu ta biba cu un of mas enfermedad cronico cu no ta contagioso, manera diabetes, presion halto y malesanan cardiovasculares. E necesidad pa un centro specialisa den e malesanan aki ta esencial pa Aruba y na Instituto Medico San Nicolas (ImSan) ta treciendo hunto hopi di e servicio y tratamiento cu e pashentnan aki ta rekeri.

Pa loke ta e servicionan pa pashentnan cu enfermedadnan cronico no contagioso, ImSan ta ofrece e Carrousel Diabetico, un centro di dialisis, servicionan di specialista di wowo y ta expandiendo pa inclui un centro di oncologia

pa trata pashentnan di cancer. Centro specialisa Dr. Joel Rajnherc a enfatisa cu, mirando e cantidad di pashentnan, banda di e gastonan halto pa samina pashentnan di cancer, cu a bira hopi necesario pa na Aruba tin un centro specialisa pa sirbi e pashent miho, ofreciendo un calidad di cuida halto.

Recientemente a añadi un dokter specialista na e team di e carrousel diabetico, unda cu pashentnan di diabetes ta acudi pa consulta, consejo, guia y tratamiento. E centro, hunto cu e sucursal na Wayaca, ta atende mas of menos 6000 pashent pa aña. E team di e centro ta inclui servicio personal specialisa, incluyendo podotherapeut, nurse, dietista y pedicurista.

Dialisis

Pa loke ta e servicio di dialisis, ImSan a adkiri “Posada Clinic” y ta brindando servicio na mas di 30% di tur e pashentnan cu ta dialisa na Aruba. Cu un internista, mas di 20 nurse y 12 mashin pa dialisis, e centro di dialisis ta acomoda 42 pashent cronico pa siman. E pashentnan aki ta tuma dialisis tres biaha pa siman y cada tratamento ta dura entre cinco pa ocho ora. Tambe e centro ta conta cu apoyo di e dos nefrologonan. E centro di dialisis tin e espacio, e fondonan y e capacidad pa amplia cu 18 mashin mas sin mester di construccion extra.

Eyecare Center

Complicacionnan di bista tambe ta un otro reto cu ta bin cu diabetes, por ehempel y actualmente tin dos specialista di wowo y henter un team trahando caba na ImSan. E “Eyecare Center” ta trata pashentnan cu complicacionnan causa pa diabetes y tur otro pashent cu ta rekeri servicio di un specialista di wowo. E dos specialistanan di ImSan ta traha hopi estrecho cu e otro dos specialistanan di wowo na Aruba y hunto nan ta discuti casonan mas dificil y tambe ta colabora cu otro na beneficio di pashentnan. Hunto, e dos specialistanan ta atende un averahe di 75 pashent pa dia y cada un tin un dia di operacion na hospital. Expansion di servicionan

Na e momentonan aki pashentnan ta wordo manda den exterior pa diferente operacion y tratamiento cu por wordo haci na Aruba mes. E deseo y meta ta pa expande servicionan na Aruba y actualmente e cuater specialistanan di wowo ta den palabracion cu AZV y Ministerio di Salud pa cu e oportunidadnan pa añadi mas tipo di servicio y operacionnan manera transplante di cornea y inyeccion den wowo.

Servicio di Ambulance

Un otro servicio cu ImSan ta responsabel pe y sigur por a nota un diferencia grandi for



di momento cu a cuminsa cu su mehoracion, ta e servicio di Ambulance. Tur servicio di Ambulance, tanto pa transporta personanan cu a bira malo na cas of otro caminda y transporte na momento di accident, ta cay bao di ImSan. A expande e flota di vehiculo, ekiponan den e vehiculonan y tur nurse, assistent y chauffeur a ricibi entrenamiento y ta certifica.

Baptist Health

Ademas di tur e servicionan cu ImSan ta ofreciendo, e institucion medico ta trahando hunto cu Baptist Health pa refina su servicionan mas y ta den proceso di lansa tratamiento di radioterapia pa pashentnan di cancer. AZV anualmente ta manda un averahe di 200 pashent pa e tratamento aki den exterior. Departamento di emergencia ImSan ta conoci pa su departamento di emergencia/urgencia, unda cu anualmente ta atende mas o menos 20 pashent. E departamento aki ta

conoci pa temponan pa warda mas cortico, compara cu hospital y ta atrae pashentnan for di tur districto di nos isla.

Triage Pa acomoda pashentnan miho y brinda un miho calidad di servicio, ImSan ta expandiendo e departamento aki pa inclui “triage”, unda cu un enfermero experiencia lo mira pashentnan prome y lo tuma nan datonan basico. Asina por determina tambe si un caso ta mas urgente cu e otro, basa riba e sintomanan di e pashent y su señalnan vital manera presion di sanger y saturacion di oxigeno den sanger.

Un director orguyoso

E director di ImSan a conclui bisando cu e ta masha orguyoso di henter e personal atento y servicial cu ta traha diariamente na ImSan, formando un ekipo cu e mesun vision, pa sirbi e pashent miho posibel. E team di ImSan tin standard hopi halto poni, determina pa duna servicio di un calidad superior. □